

Sababu za Kushukuru na Kusali



SABATO MCHANA

Somo la Juma Hili: *Flp. 1:1–18, 1 Kor. 13:1–8, Yer. 17:9, Kol. 1:1–12, 1 Pet. 1:4, Zab. 119:105, Isa. 30:21.*

Fungu la Kukariri: “Nami niliaminilo ndilo hili, ya kwamba yeye aliyeanza kazi njema mioyoni mwenu ataimaliza hata siku ya Kristo Yesu” (*Wafilipi 1:6*).

Paulo kwa makusudi kabisa anaanza nyaraka zake kwa maneno ya salamu—na shukrani. “Neema na iwe kwenu, na amani, zitokazo kwa Mungu Baba yetu. Twamshukuru Mungu, Baba yake Bwana wetu Yesu Kristo” (*Kol. 1:2, 3*).

Sisi, kama Paulo, tunayo mengi ya kushukuru kwayo. Tumepata neema ya Mungu kwa njia nyingi sana, njia ambazo hata malaika hawawezi kuzifahamu. Ndivyo ilivyo pia kuhusu kipawa cha Mungu cha amani, kinachojumuisha mapatano na Mungu na tumaini linalobubujika kutoka katika upendo wa Mungu.

Kwa kiwango cha kibinadamu, tunaweza kutoa na kuonesha shukrani kwa wengine na kuwa na tumaini kwamba watu wanashukuru kwa mambo tunayowafanyia. Wazazi wanaomba kwamba watoto wao wampende Mungu na kuthamini siku moja, ikiwa si sasa, jinsi walivyojinyima ili kuwalea vizuri zaidi wawezavyo. Lakini, kama wanadamu, tunafanya makosa mengi, na tunajifunza kutokana nayo (au angalau tunapaswa kujifunza kutokana nayo).

Juma hili tutachunguza maneno ya Paulo ya utangulizi ya shukrani na maombi katika Wafilipi na Wakolosai, ambayo yanaweza kujenga na kuimarisha maisha yetu ya maombi.

**Jifunze somo la juma hili kwa maandalizi ya Sabato ya Januari 10.*

Ushirika Katika Injili

Soma

Wafilipi 1:3–8. Paulo anashukuru kwa jambo gani? Anawapa Wafilipi uhakikisho gani, na kwa nini hilo ni muhimu?

Paulo alianzisha kanisa huko Filipi; hivyo, twaweza kuona joto la ushirika wa Kikristo kote katika waraka wake. Ingawa ametengwa kwa mamia ya maili, Paulo, akiwa katika minyororo na kutiwa gerezani, analikumbuka kanisa na washiriki wake; anawaonea shauku sana “katika moyo wake Yesu Kristo” (*Flp. 1:8*); anamshukuru Mungu kwa ajili yao. Ombi la Paulo la shukrani hata linatoa mtupo wa jicho kwa maombezi ya Yesu kwa ajili yetu mbinguni.

Katika kifuko cha kifuni cha kuhani mkuu kulikuwa na mawe 12 yanayowakilisha makabila 12 ya Israeli. Watu walipaswa kuwa “juu ya moyo wake” alipokuwa akiwaombea (*Kut. 28:29*). Kwa njia kubwa zaidi kama Kuhani wetu Mkuu katika patakatifu pa mbinguni, Yesu anapeleka majina ya watu Wake mbele za Baba.

Cha kupendeza, maneno yaliyotumika katika Wafilipi 1:3 yana maana nyingi, yakisisitiza uhusiano wa karibu kati ya Paulo na Wafilipi. Kwa kawaida yanatafsiriwa kwamba Paulo anawakumbuka katika maombi, lakini yanaweza pia kurejelea kumkumbuka kwao. Kwa vyovyote vile, yanasisitiza juu ya uhusiano wa karibu baina yao, ambao neno “ushirika” (*Kiyunani: koinonia*) pia linasisitiza. Kama vile Paulo alivyokuwa na ushirika katika mateso ya Kristo (*Flp. 3:10*), Wafilipi “walishiriki” (*Kiyunani: sunkoinōneō*) katika mateso ya Paulo na kushiriki kifedha ili kutegemeza huduma ya Paulo (*Flp. 4: 14, 15*). Ushirika huu baina yao, ambao ulikuwa “tangu siku ile ya kwanza hata leo hivi” (*Flp. 1:5*), unampeleka kumshukuru Mungu kwa ajili yao na kuwaombea “kwa furaha” (*Flp. 1:4*).

Cha ajabu, Paulo anaelezea mazingira yake ya gerezani kwa namna chanya kabisa—kama yanayotoa fursa ya “kutetea Injili na kuithibitisha” (*Flp. 1:7*). Kutumia kwake maneno haya mawili ya kisheria kunaashiria kesi yake iko karibu, lakini pia kwamba Paulo anawashirikisha wanajeshi na wageni katika injili. Kuitetea (*Kiyunani apologia*) dhidi ya mashambulizi na kuthibitisha ukweli wake wa milele vyote ni muhimu. Paulo anaonekana kutojali sana mustakabali wake mwenyewe kuliko kuhusu kuthibitishwa kwa injili yenyewe. Iwe anaishi au anakufa, Paulo anao uhakika kwamba Mungu ataimaliza “kazi njema” aliyoianza kwa wote wanaomtumaini (*Flp. 1:6*).

Unaelewaje ahadi kwamba Mungu ataimaliza “kazi njema moyoni mwako” (*Flp. 1:6*)? Hilo linamaanisha nini? Je, kazi hii itaisha kabla ya Kuja kwa Yesu Mara ya Pili?

Orodha ya Paulo ya Mambo ya Kuomba

Miaka kadhaa iliyopita, kulikuwa na mchungaji aliyezungumza kuhusu maombi yanayonihsu mimi, mimi, mimi, na mahitaji au shauku zangu. Aliyaelezea kwa kufaa kama “maombi madogo ya ubinafsi,” kwa sababu Mungu anafikiria mambo makubwa zaidi.

Soma ombi la Paulo katika Wafilipi 1:9–11. Lengo lake ni nini na anaomba mambo gani makubwa? Linakuambia nini kuhusu maombi?

Ombi hili ni maneno arobaini na tatu tu katika Kiyunani, lakini linajumuisha mambo yote Paulo, ambayo atayaelezea zaidi katika sehemu nyingine ya waraka: upendo, ufahamu, hekima, kuwa na mioyo safi, wasiosababisha makosa, na haki tuliyo nayo kwa njia ya Yesu Kristo. Msingi wa ombi hili pamoja na shukrani za Paulo zilizotangulia ni msisitizo kwa kanisa kwa ujumla. Ombi la Paulo linawalenga wengine kabisa, kwa niaba ya kanisa zima na kwa ustawi wake. Hebu tutazame kwa karibu zaidi baadhi ya vipengele kimoja kimoja vya maombi:

Pendo lizidi kuwa jingi. Paulo haombi tu kwa ajili ya upendo kuongezeka lakini kwa ajili ya upendo kuelekezwa katika mwelekeo maalumu: “katika hekima na ufahamu wote” (*Flp. 1:9*). Kurejelea ufahamu hakumaanishi ufahamu wa kiakili tu bali kunadokeza ufahamu wa mambo ya kiroho ambayo yanaweza kupatikana tu kwa kufanya ushirika na Mungu na kujifunza Neno Lake (*tazama Efe. 1:17, Efe. 4:13, 1 Tim. 2:4*).

Hekima. Hili linaelezewa na Paulo kama kuweza “kuyakubali yaliyo mema” (kuyatofautisha na yale yenye kudhuru kimaadili) “na kuwa na mioyo safi, bila kosa” (*Flp. 1:10*).

Kuwa na mioyo safi. Neno hili katika lugha ya Kiyunani linamaanisha “kuhukumiwa kwa nuru ya jua” na linarejelea usafi wa matendo usiotiwa doa: “Kila kitu wanachofanya Wakristo kinapaswa kuwa bayana kama mwanga wa jua.”—Ellen G. White, *Reflecting Christ*, uk. 71.

Bila kuwa na kosa. Hili linamaanisha kutokuwa kikwazo, kutosema au kufanya jambo lolote ambalo lingefanya iwe vigumu kwa mtu kuamini.

Haki kwa njia ya Kristo. Paulo anakizungumzia kipengele hiki kwa undani katika nyaraka za Warumi na Wagalatia na atakielezea zaidi pia katika Wafilipi 3. Hatuna haki yetu wenyewe bali tu ile tunayoipokea kwa njia ya Kristo.

Haidhuru tunafanya kitu gani kingine, pendo letu linawezaje “kuzidi kuwa jingi” (*Flp. 1:9*)? Kwa nini hilo ni muhimu sana kwa maisha ya Kikristo? (*Tazama pia 1 Kor. 13:1–8*.)

Kutumia Utambuizi wa Kiroho

Inaeleweka kwamba Wafilipi walifadhahishwa waliposikia juu ya kutiwa gerezani kwa Paulo. Sasa kazi yake ilikuwa imewekewa mipaka sana. Asingeweza kusafiri. Asingeweza kuhubiri. Asingeweza kutembelea masinagogi na kuwafundisha watu kuhusu Yesu kama Masihi. Asingeweza tena kufungua makanisa. Wafilipi walimtuma Epafrodito ili kuhakikisha hali ya mtume huyo, ili kumtia shime na kuhakikisha kwamba mahitaji yake ya kimwili yalitimizwa.

Soma Wafilipi 1:12–18. Paulo anakuchukuliaje kufungwa kwake? Ni masomo gani tunaweza kujifunza kutokana na mtazamo wake, licha ya hali zilizomkabili?

Ujumbe ambao Paulo alimpa apeleke lazima uliwashangaza Wafilipi. Paulo aliona hali yake kwa mtazamo tofauti. Utambuizi wake wa kiroho ulimfanya aone kufungwa kwake gerezani kama jambo jema. Hakukuzuia kazi yake kabisa, lakini “yametokea zaidi kwa kuieneza Injili” (*Flp. 1:12*). Ambapo wengine waliona tu minyororo na nondo, Paulo aliwaona walinzi wake wa Kirumi kama roho zinazofaa katika ufalme wa Mungu. Aliona pia kwamba kufungwa kwake gerezani kuliwatia shime sana wengine kujishughulisha zaidi na kuazimia zaidi kutangaza injili, kusema kwa ujasiri kwa ajili ya Kristo bila kuogopa matokeo.

Huenda ikawa vigumu kudhani, lakini wengine walifikiria kufaidika na kufungwa kwa Paulo. Inavyoonekana, walifikiri kutoonekana kwake kungefanya watazamwe wao zaidi na kuhubiri kwao injili wenyewe. Ni mfano wenye nguvu kiasi gani lakini wa kusikitisha wa ubinafsi wa kibinadamu, hata katika kanisa. Kama vile Yeremia alivyosema zamani kabla ya Paulo: “Moyo huwa mdanganyifu kuliko vitu vyote, una ugonjwa wa kufisha; nani awezaye kuujua?” (*Yer. 17:9*).

Kinachofurahisha, kinyume chake, baadhi ya wafanyakazi waaminifu pia wakawa na bidii zaidi ya kuihubiri injili. Walimpenda sana Paulo kiasi kwamba mateso waliyomwona akivumilia kwa ajili ya imani yake yaliwafanya kumwamini Kristo zaidi na kuwatia moyo kujishughulisha zaidi kwa ajili ya Bwana. Yaliwapa nguvu ya kwenda mahali ambapo kabla waliogopa kwenda; yaliwaongoza kusema katika hali ambazo kabla walinyamaza; yalisababisha hata watu wengi zaidi kumpokea Kristo na kueneza injili ya wokovu.

Umejifunza somo gani kutokana na uzoefu ambao, ingawa ni mbaya pasipo shaka, pia ulileta manufaa fulani? Hata katika masuala ambayo manufaa hayaonekani wazi, tunawezaje kujifunza kumtumaini Mungu bila kujali?

Tunda la Injili

Uhusiano wa Paulo na Wakolosai ulikuwa tofauti na ule wa Filipi. Aliwajumuisha miongoni mwa wale ambao “wasioniona uso wangu katika mwili” (Kol. 2:1). Hata hivyo, Paulo aliwahakikishia, kama alivyofanya kwa Wafilipi, kwamba anamshukuru Mungu kwa ajili yao na “sikuzote” anawaomba.

Soma Wakolosai 1:3–8. Ni mambo gani matatu ambayo Paulo anamshukuru Mungu kwayo?

Paulo anaweka pamoja nemi tatu ambazo anazitaja katika sehemu nyingine: imani, tumaini, na upendo (*tazama* 1 Kor. 13:13, 1 The. 1:3, 1 The. 5:8). Ona kwamba Paulo hawasifii Wakolosai kwa mambo haya. Anamshukuru Baba kwa ajili yao, kwa sababu kama anavyosema Yakobo hivyo ni miongoni mwa vipawa “vilivyo kamili” tunavyopata kutoka Kwake (Yak. 1:17). Tunapona upendo wa Mungu kwetu, unatuongoza kwenye imani katika Kristo (Efe. 2:4–8), na tunapokea tumaini la mbinguni. Petro analielezea kama “urithi usioharibika, usio na uchafu, usionyauka, uliotunzwa mbinguni kwa ajili yenu” (1 Pet. 1:4).

Paulo pia anakazia kwamba injili ni ya kutegemewa kwa sababu imejengwa juu ya “neni la kweli.” Hiki ni kirai ambacho Paulo anakitumia mahali pengine akirejelea neno la Mungu lililovuviwa (*tazama* 2 Kor. 6:7, 2 Tim. 2:15). Tofauti na “neni la wanadamu,” linafanya kazi “kwa ufanisi” kwa wale wanaoamini (1 The. 2:13) na kutimiza mapenzi ya Mungu (Isa. 55:11). Kwa hiyo, injili inapotangazwa, uweza wa Mungu unadhihirishwa kupitia kazi ya Roho Mtakatifu katika mioyo ya wasikilizaji, na watu wanaitikia. Injili yenyewe inazaa matunda kwa sababu ni “neni la uzima” (Flp. 2:16).

Pengine kinachostaajabisha zaidi ni kuenea kwa injili kwa muda mfupi sana. Ndani ya takriban miaka thelathini ya kifo na ufufuo wa Kristo, Paulo angeweza kusema tayari ilikuwa imeenea “katika ulimwengu wote” (Kol. 1: 6). Baadaye kidogo katika sura hiyo hiyo, anasema injili “iliyohubiriwa katika viumbe vyote vilivyo chini ya mbingu” (Kol. 1:23). Mfumo mpana wa barabara za Kirumi uliwezesha mawasiliano na usafiri wa haraka, ndivyo ambavyo nyaraka za Paulo zingeweza kusambazwa sana na upesi. Lakini ni uweza wa Mungu utendao kazi kupitia neno liletao uzima wa kiroho ndani ya mtu (Yak. 1:18, 1 Pet. 1:23), na kumfanya kuwa kiumbe kipya katika Kristo (2 Kor. 5:17).

Katika Wakolosai 1:5, Paulo anaandika kuhusu “tumaini mlilowekewa akiba mbinguni.” Unaelewa nini kuhusu tumaini hilo, na kwa nini linakuhusu wewe binafsi, ingawa kwa kweli haufai?

Nguvu ya Maombi

Soma Wakolosai 1:9–12. Ni maombi gani mahususi unayapata katika ombi la Paulo?

Paulo anaomba “ili rajazwe maarifa ya mapenzi yake.” Paulo anaelezea kujua mapenzi ya Mungu kama “hekima yote na ufahamu wa rohani” (*Kol. 1:9*). Hekima huja, kwanza kabisa, kwa kumtumaini Mungu kabisa, kuwa tayari kufanya mapenzi Yake (*Yn. 7:17*), na kutotegemea akili zetu wenyewe (*Mit. 3:5*). Lakini mara nyingi swali hutokea, “Mapenzi ya Mungu ni nini kwangu katika hali hii?” Kuna vyanzo vikuu vinne ambavyo tunaweza kujifunza mapenzi ya Mungu tunapoyatafuta kwa maombi:

1. Chanzo muhimu zaidi cha hekima ni Biblia yenyewe. “Neno lako ni taa ya miguu yangu na mwanga wa njia yangu” (*Zab. 119:105*).
2. Mungu ametupa hekima maalumu kwa siku za mwisho kupitia Roho ya Unabii (*Ufu. 12:17, Ufu. 19:10*) kama inavyodhihirishwa kupitia maandishi ya Ellen White. Biblia inatutia shime kumwamini “Bwana, Mungu wenu, ndivyo mtakavyothibitika; waaminini manabii wake, ndivyo mtakavyofanikiwa” (*2 Nya. 20:20*).
3. Mapenzi ya Mungu na uongozi Wake pia vinaweza kujulikana kupitia hali ya kudra/majaliwa, kwa kumwomba afungue au afunge milango (*tazama Kol. 4:3*).
4. Roho Mtakatifu hutuongoza mara tunapojifunza kutambua sauti Yake: “Na masikio yako yatasikia neno nyuma yako, likisema, ‘Njia ni hii, ifuateni,’ mgeukapo kwenda mkono wa kuume/Na mgeukapo kwenda mkono wa kushoto” (*Isa. 30:21*).

Paulo anawaomba Wakolosai kuwa “mwenende kama ulivyo wajibu wenu kwa Bwana” (*Kol. 1:10*). Bila shaka, hakuna mtu “anayestahili” kwa asili, lakini Mungu anatushesabu kuwa tunastahili kwa neema Yake na anatuita tuishi kulingana na wito huo mkuu (*Efe. 4:1, 1 Thes. 2:12*). Paulo anatumia kitenzi “enenda” au “tembea” mara tatu zaidi katika waraka huu pekee (*Kol. 2:6, Kol. 3:7, Kol. 4:5*). Inamaanisha kuishi na kutenda kulingana na sheria ya Mungu (*Kut. 18:20*), kunakowezekana tu kupitia kazi ya Roho Mtakatifu (*Eze. 36:27*).

Paulo pia anaomba kwamba maisha yao (na yetu) yawe ya “kumpendeza kabisa” Bwana na kisha anaorodhesha njia kadhaa za kufanya hivyo: “Mkizaa matunda katika kila kazi njema” (*Kol. 1:9, 10*); kisha “kuzidi katika maarifa ya Mungu” (*Kol. 1:10*); na, hatimaye, katika “kushukuru” (*Kol. 1:12*).

Ikiwa mtu angekuuliza, “Unajuaje kwamba Mungu anakuongoza katika njia moja au nyingine?” ungejibuje—na kwa nini?

Jifunze Zaidi: “Wengi hawawezi kuweka mipango thabiti kwa ajili ya wakati ujao. Maisha yao ni ya kubadilikabadilika. Hawawezi kutambua matokeo ya mambo, na hili mara nyingi linawajaza wasiwasi na msukosuko. Hebu tukumbuke kwamba maisha ya watoto wa Mungu katika ulimwengu huu ni maisha ya wasafiri. Hatuna hekima ya kupanga maisha yetu wenyewe. Si juu yetu kupanga maisha yetu ya wakati ujao. ‘Kwa imani Ibrahimu alipoitwa aliitika, atoke aende mahali pale atakapopapata kuwa urithi; akatoka asijue aendako.’ Waebrania 11:8.

“Kristo katika maisha yake hapa duniani hakupanga kwa ajili Yake Mwenyewe. Alikubali mipango ya Mungu kwa ajili Yake, na siku baada ya siku Baba alifunua mipango Yake. Hivyo tunapaswa kumtegemea Mungu, ili maisha yetu yawe utimilifu sahili wa mapenzi Yake. Tunaposalimisha njia zetu Kwake, Ataongoza hatua zetu.

“Watu wengi sana, katika kupanga kwa ajili ya maisha mzuri sana ya wakati ujao, wanashindwa kabisa. Mruhusu Mungu akupangie. Kama mtoto mdogo, tumainia uongozo wa Yeye ambaye ‘atailinda miguu ya watakatifu wake.’ 1 Samweli 2:9. Mungu kamwe hawaongozi watoto Wake tofauti na ambavyo wangechagua kuongozwa, ikiwa wangeweza kuona mwisho tangu mwanzo na kutambua utukufu wa kusudi wanalolitimiza kama watendakazi pamoja Naye.”—*The Ministry of Healing*, uk. 478, 479.

Maswali ya Kujadili:

① Tafakari kuhusu juma lililopita na uorodheshe mambo unayoshukuru kwayo. Je, unaweza kuwa na mengi zaidi ya kushukuru kwayo kuliko unavyotambua?

② Tafakari zaidi sentensi ya mwisho wa nukuu ya Ellen G. White hapo juu. Hilo ni tamko lenye nguvu sana la imani. Unawezaje kujifunza kumtumaini Mungu kwa namna ya ndani kiasi hicho?

③ Kwa kuzingatia Wakolosai 1:6, 23, jadili kauli ifuatayo: “Kwa muda wa miaka arobaini kutokuamini, manung’uniko na uasi viliwazuia Israeli ya kale kuingia katika nchi ya Kanaani. Dhambi zilezile zimeichelewesha Israeli ya sasa isiingie katika Kanaani ya mbinguni. Katika matukio yote haya mawili hakuna hata tukio moja ambapo ahadi za Mungu zilikuwa na makosa. Ni kutokuamini, kufanana na ulimwengu, kutojiweka wakfu, na ugomvi miongoni mwa watu wanaodai kuwa ni watu wa Bwana ndivyo vimetuzuia katika ulimwengu huu wa dhambi na huzuni kwa miaka mingi. Kama kanisa la Kristo lingefanya kazi yake iliopewa kama Bwana alivyoagiza, ulimwengu wote ungekuwa umeonywa kabla ya hili na Bwana Yesu angekuwa amekuja katika dunia yetu kwa uweza na utukufu mwingi.”—Ellen G. White, *Last Day Events*, uk. 30, 31. Ni kwa njia zipi tunaweza kuwa na hatia ya mambo yaleyale leo?